

एज्राया सफू म्हसीका

थ्व सफू एज्रा नांयाम्ह पुजाहारी व शास्त्री च्वःगु खः। वयागु हे नामं थ्व सफूया नां एज्रा तःगु खः। इस्राएलीत यरूशलेमय् लिहां वःगु खँ हे थ्व सफूया मू विषय खः। एज्रा व नहेम्याहया सफू न्हापा छगू हे सफू खः। लिपा यहदीतय्सं थ्व सफूयात निब्वः यानाः न्हापांगु एज्रा व निगूगु एज्रा धकाः नां बिल। तर थौकन्हय्या हिब्रू भाषाय् बाइबलय् थुपिं निगू सफूयात एज्रा व नहेम्याह धकाः धाइ। एज्राया सफूया छुं ब्वः ४:८ निसें ६:१८ व ७:१२-२६ आरमेइक भाषां च्वःगु खः, अले मेगु ब्व हिब्रू भाषां च्वःगु खः। एज्रायात निगुलि भाय् बांलाक वः। थुकी परमप्रभुया मनूतय्सं वयकःया ज्याया लागिं नुगः मस्यासे दान ब्यूगु खँ नं क्यनातःगु दु, थ्व थौकन्हय्यापि ख्रीष्टियनतय्सं नं सय्के माःगु खँ खः।

थ्व सफू ई.पु. ४४० पाखे च्वःगु खः। एज्राया सफुलिइ इतिहासया सफूया लिपा जूगु घटना च्वयातःगु दु। थुकी बेबिलोनं छुं यहदीत लिहां वया यरूशलेमय् हाकनं च्वंगु व इमिसं हाकनं परमेश्वरया आराधना यायेगु शुरु याःगु खँ दु।

थुकी च्वयातःगु घटनात छसिंकथं थथे दु –

१. फारसयाम्ह जुजु कोरसयागु आज्ञां यहदीतयगु न्हापांगु पुचः बेबिलोनं लिहां वःगु।
२. यरूशलेमय् देगः हाकनं दय्काः परमेश्वरयात अर्पण याःगु, अले हाकनं परमेश्वरयात आराधना यायेगु ज्या शुरु याःगु।
३. उकिया छुं दै लिपा यहदीतयगु मेगु पुचः एज्रालिसैं यरूशलेमय् लिहां वःगु खः। एज्रा परमेश्वरया व्यवस्था बांलाक स्यूम्ह पुजाहारी खः, वं यहदीतयत थःगु धार्मिक व सामाजिक जीवन हाकनं शुरु यायेत ग्वाहालि यात। थुकथं वं इस्राएलया आत्मिक सम्पदायात रक्षा यात।

धलः पौ

बेबिलोनं न्हापांगु पुचः लिहांवःगु १:१-२:७

देगःयात हाकनं दय्काः अर्पण याःगु ३:१-६:२२

बेबिलोनं मेगु पुचः एज्रालिसैं लिहांवःगु ७:१-१०:४४

एज्रा

जुजु कोरेसं यहदीतयत् लिहां वने ब्यूगु

1 फारसयाम्ह जुजु कोरेसया न्हापांगु दैय्* यर्मिया अगमवक्तापाखें वःगु परमप्रभुयागु वचन पूर्वकेत, परमप्रभुं फारसयाम्ह जुजु कोरेसया नुगःयात ग्वाकादिल। अथे जुयाः वं च्वयाः देशया फुक्क थासय् थ्व खँ घोषणा याकल।

2 “फारसयाम्ह जुजु कोरेसं थथे धयादी☆— ‘परमप्रभु स्वर्गयाम्ह परमेश्वरं पृथ्वीयागु फुक्क राज्य जितः बियादीगु दु। वय्कलं हे जितः यहूदाया यरूशलेमय् वय्कःया निति छगू देगः दय्केत उजं बियादीगु दु।

3 छिमिगु दथुइ च्वनाच्च्वं पिं वय्कःया मनूतयत् इस्राएलयाम्ह परमप्रभु परमेश्वरया देगः हाकनं दय्केत यहूदाया यरूशलेमय् लिहां वनेब्यु। वय्कलं इमित सुवाः बियादीमा। यरूशलेमय् दीम्ह वय्कः हे खः।

4 ल्यंदुपिं यहदीत गन गन च्वनाच्च्वं गु दु, उगु थाय्यापिं इमि जःलाखःलातय्सं लिहां वनीपिन्त वहः, लुँ, लैय् माःगु सामान व पशुत, अले यरूशलेमय् च्वंगु परमेश्वरया देगःया निति थथःगु इच्छां देछा नं बीमाः।’ ”

5 अनंलि यरूशलेमय् परमप्रभुया देगः हाकनं दय्केत परमेश्वरं ग्वाकादीपिं यहूदा व बेन्यामीन कुलया परिवारयापिं मू मू मनूत अले पुजाहारीत व लेवीत सकलें हे च्वय् वनेत तयार जुल।

6 इमि सकल जःलाखःलातय्सं थःगु इच्छां ब्यूगु देछानापं इमित वहःयागु थल, लुँ, लैय् माःगु सामान, पशु व थिकेथिकेगु मालताल बियाः ग्वाहालि बिल।

7 नबूकदनेसरं यरूशलेमं हयाः थः घःया देगल्य् तःगु परमप्रभुया देगःया थलबल जुजु कोरेसं इमित लित बिल।

8 फारसयाम्ह जुजु कोरेसं धुकूया नायः मित्रेतायात व फुक्क जिम्मा बिल। वं ल्याः खानाः धलः दय्काः उपिं थलबल यहूदायाम्ह नायः शेशबस्सरयात बिल।

9 धलः थथे दु —

लुँयागु स्विपाः भू

वहःयागु द्रुःछिपाः भू (१,०००)

वहःया निङ्गुंगः बाटा (२९)

10 लुँयागु स्विगः ख्वला

वहःयागु थीथी कथंयागु प्यसः व झिगः ख्वला (४१०)

मेमेगु द्रुःछि गः थलबल। (१,०००)

* 1:1 १:१ फारसयाम्ह जुजु कोरेसं शासन यागु न्हापांगु दै ई.पु ५३८ य् खः।

३६:२२-२३; यशै ४४:२८; यर २९:१०-१४

☆ 1:2 १:२ २ इति

11 लुँ व वहःयागु थलबल मुक्कं न्याद्रुः व प्यसःगः (५,४००) दु। ज्वनायंकूपि बेबिलोनं यरुशलेमय् लिहां वःबलय् शेशबस्सरं व फुक्क यरुशलेमय् हल।†

2

लिहांवःपि यहदीतयगु नां धलः

नहे ७:४-७२

1 बेबिलोनं यरुशलेम व यहदाय् लिहां वयाः थथःगु शहरय् च्वनाच्चपिं मनूतयगु नां धलः थथे दु। यक्व न्हापा बेबिलोनयाम्ह जुजु नबूकदनेसरं इमित ज्वनाः बेबिलोनय् यंकुगु खः।

2 इमि नायःत थुपि खः – यरुबाबेल, येशूअ, नहेम्याह, सरायाह, रेलयाह, मोर्दैकै, बिल्शान, मिस्पार, बिग्वै, रेहूम व बानाहा।

लिहांवःपि इस्राएली मिजंतयगु नां धलः थथे दु –

3 परोशया सन्तान २,१७२ म्ह

4 शपत्याहया सन्तान ३७२ म्ह

5 आराया सन्तान ७७५ म्ह

6 पहत-मोआबया सन्तान, (येशूअ व योआबयापाखें) २,८१२ म्ह

7 एलामया सन्तान १,२५४ म्ह

8 जन्तूया सन्तान ९४५ म्ह

9 जक्कैया सन्तान ७६० म्ह

10 बानीया सन्तान ६४२ म्ह

11 बेब्रैया सन्तान ६२३ म्ह

12 अज्गादया सन्तान १,२२२ म्ह

13 अदोनीकामया सन्तान ६६६ म्ह

14 बिग्वैया सन्तान २,०५६ म्ह

15 आदीनया सन्तान ४५४ म्ह

16 आतेरया सन्तान (हिजकियापाखें) ९८ म्ह

17 बेजैया सन्तान ३२३ म्ह

18 योराया सन्तान ११२ म्ह

19 हाशूमया सन्तान २२३ म्ह

20 गिब्बारया सन्तान ९५ म्ह

21 बेथलेहेमयापिं मनूत १२३ म्ह

† 11:11 १:११ ज्वनायंकूपि बेबिलोनं यरुशलेमय् लिहां वःगु ई.पु. ३७

- 22 नतोपाया मनूत ५६ म्ह
 23 अनातोतयापिं मनूत १२८ म्ह
 24 अज्मावेतयापिं मनूत ४२ म्ह
 25 किर्यत-यारीम, कपीरा वा बेरोतयापिं मनूत ७४३ म्ह
 26 रामा व गेबायापिं मनूत ६२१ म्ह
 27 मिकमाशयापिं मनूत १२२ म्ह
 28 बेथेल व ऐयापिं मनूत २२३ म्ह
 29 नेबोयापिं मनूत ५२ म्ह
 30 मग्बीसयापिं मनूत १५६ म्ह
 31 मेगु एलामयापिं मनूत १,२५४ म्ह
 32 हारीमयापिं मनूत ३२० म्ह
 33 लोद, हादीद व ओनोयापिं मनूत ७२५ म्ह
 34 यरीहोयापिं मनूत ३४५ म्ह
 35 सेनाहयापिं मनूत ३,६३० म्ह
 36 लिहांवःपिं पुजाहारीतय्गु नां धलः थथे दु –
 यदायाहया सन्तान (येशूअया वंशपाखें) ९७३ म्ह
 37 इम्मेरया सन्तान १,०५२ म्ह
 38 पशहरया सन्तान १,२४७ म्ह
 39 हारीमया सन्तान १,०१७ म्ह
 40 लिहांवःपिं लेवीतय्गु नां धलः थथे दु –
 येशूअ व कादमीएलया सन्तान (होदबियाया वंशपाखें) ७४ म्ह
 41 म्ये हालीपिं आसापया सन्तान १२८ म्ह
 42 लिहांवःपिं देगःया पिवाःतय्गु नां धलः थथे दु –
 शल्लूम, आतेर, तल्मोन, अक्कूब, हतीता, शोबैया सन्तान मुक्कं सच्छि व
 स्विगूमह (१३९)
 43 लिहांवःपिं देगलय् सेवा याइपिनिगु नां धलः थथे दु –
 सीहा, हसूपा, तब्बाओतया सन्तान
 44 केरोस, सीआ, पादोन
 45 लेबाना, हगाबा, अक्कूब
 46 हागाबा, शल्मै, हानान
 47 गिदेल, गहरका, रायाह,

48 रसीन, नकोदा, गज्जाम
 49 उज्जा, पसेह, बेजै
 50 अस्ना, मोनिम, नेपुसीम,
 51 बक्बूक, हकूपा, हर्हुर,
 52 बस्लूत, महीदा, हर्शा
 53 बर्कोस, सीसरा, तेमह,
 54 नसीह व हतीपा
 55 लिहांवःपिं जुजु सोलोमनया दरबारय् ज्या याइपिनि सन्तानया नां धलः थथे
 दु -

सौतै, हस्सोपेरेत, पारुदया सन्तान
 56 याला, दर्कोन, गिदेल,
 57 शपत्याह, हत्तील,
 पोकेरेत-हसेबायीम व आमी।
 58 देगलय् सेवा याइपिं व सोलोमनया दरबारय् ज्या याइपिनि सन्तान मुक्क
 स्वसः व गुइनिम्ह (३९२)

59 बेबिलोनया तेल-मेलह, तेल-हर्शा, केरूब, आदोन व इम्मेर शहरं लिहां वयाः
 थःगु परिवार इस्राएल्या वंशपाखें वःगु खः धकाः दसि बी मफुपिं थुपिं खः -

60 दलायाह, तोबिया, नकोदाया सन्तान मुक्कं खुसः व न्येय्निम्ह (६५२)

61 अले पुजाहारीया सन्तान मध्ये -

होबायाहया सन्तान, हक्कोसया सन्तान व गिलादी बर्जिल्लैया छम्ह म्हाय्यात
 ब्याहा यानाः वयागु हे नां तःम्ह बर्जिल्लैया सन्तान।

62 थुपिं मनूतय्सं पुर्खातय्गु धलखय् थःगु नां माल अय्नं लुइके मफुत। उकिं
 इपिं अशुद्ध ठहरय् जुयाः इमित पुजाहारीया ज्यां लिकाल।

63 अले राज्यपालं दकलय् तःधंम्ह पुजाहारी “ऊरीम” व “तुम्मीम”^{*} छयलाः
 परमप्रभुयाके छु यायेगु धकाः मन्यंतले इमित तसकं पवित्र नसां छुं नं नये मते धकाः
 धाल।[☆]

64 लिहांवःपिं मुक्कं मनूतय्गु ल्याः पीनिद्रुः व स्वसः व खुइम्ह (४२,३६०) दु।

65 थुपिं लिहां वःपिन्के दासदासीत न्हयद्रुः व स्वसः व स्विन्हय्म्ह (७,३३७) नं
 दु। इपिं त्वःताः इमि निसः (२००) म्ह मिजं व मिस्त म्ये हालीपिं नं दु।

^{*} **2:63** २:६३ ऊरीम व तुम्मीम थ्व परमप्रभुया इच्छा सीकेत पुजाहारीतय्सं छयलिगु निगू ज्वलं खः

[☆] **2:63** २:६३ गन्ती २७:२९

66 इमि सल न्हयस् व स्विइखुम्ह (७३६) म्ह खच्चर निसः पिइन्याम्ह (२४५) म्ह

67 ऊँट पेसः व स्विन्याम्ह (४३५) व गधा खुद्रुः व न्हयस् व निइम्ह (६,७२०) दु।

68 लिहांवःपिं यस्शलेमय् परमप्रभुयागु देगःया थासय् वयेधुंकाः छुं परिवारया मू मूनूतयसं या देगः पुलांगु जगया च्वय् हाकनं दय्केत थथःगु इच्छां देछा बिल।

69 इमिसं थःपिन्सं फुकथं देगः हानं दय्केत न्यासः (५००) किलोग्राम लुँ, निद्रुः व च्यासः (२,८००) किलोग्राम वहः व पुजाहारीतय्सं फीगु सच्छि (१००) ज्वः वसः बिल।

70 पुजाहारीत, लेवीत, म्ये हालीपिं, देगलय् पिवाः च्वनिपिं व देगलय् सेवा याइपिं थथःगु शहरय् मेपिं मूनूतलिसें च्वन। अले इस्राएलया मेपिं मूनूत इमिगु थथःगु शहरय् च्वन।

3

वेदी हाकनं दय्कूगु

1 न्हयगूगु ला क्यंबलय्* थथःगु शहरय् च्वनेधुंकूपिं इस्राएलीत सकलें छप्पें जुयाः यस्शलेमय् मुंवल।☆

2 योसादाकया काय् येश्अ व वया थःथिति पुजाहारीत अले शालतिएलया काय् यस्बाबेल व वया थःथितिनापं मिलय् जुयाः परमेश्वरया मनू मोशाया व्यवस्थाय् च्वया तः थें होमबलि छायेत इस्राएलया परमेश्वरया वेदी दय्कल।

3 थः जःखः च्वनाच्चपिं मूनूत खनाः इपिं ग्याःसां इमिसं वेदी न्हापायागु थासय् हे दय्कल। अले इमिसं उकी परमप्रभुया नितिं न्हियान्हिथं सुथय्सियागु व बहनीयागु होमबलि छायेगु याना हल।☆

4 इमिसं नियमकथं बल्चाबायया नखः हन। नखःया छन्हु छन्हुया नितिं क्वःछिनातःगु ल्याःकथं इमिसं होमबलि छाल।☆

5 थुपिं बाहेक न्हियान्हिथंया होमबलि, अमाइ-बलि व परमप्रभुं क्वःछिनादीगु दँयदसं मानय् यायेमाःगु फुकक पवित्र नखःचखःया नितिं देछा छाल। थुपिनापं परमप्रभुया नितिं थथःगु इच्छां हःगु फुकक भेटी छाल।☆

* 3:1 ३:१ न्हयगूगु ला क्यंबलय् थ्व अक्टोबर, सेप्टेम्बर ५३७ ई.पु. खः ☆ 3:1 ३:१ नहे ८:१

☆ 3:3 ३:३ गन्ती २८:१-८ ☆ 3:4 ३:४ गन्ती २९:१२-३८ ☆ 3:5 ३:५ गन्ती २८:११-१५

6 उबलय् परमप्रभुया देगःयागु जग तःगु मदुनिसां इमिसं न्हयगूगु लाया न्हापांगु दिननिसें† परमप्रभुयात होमबलि छायेगु याना हल।

देगः दय्केगु ज्या हाकनं शुरु जूगु

7 इमिसं दकःमि व सिकःमितय्त धिबा अले सीदोन व टुरोसय् च्वंपि मनूतय्त लेबनानं समुद्रया लैपु जुयाः योप्पा तक देवदास्या सिँ हयेत नयेगु नसा त्वँसा व चिकं बिल। छायेधाःसा फारसयाम्ह जुजु कोरेसं थथे यायेत मन्जुरी ब्यूगु खः।

8 यरूशलेमय् परमेश्वरया देगलय् इपि थ्यंकः वःगु निगूगु दँया निगूगु लायः‡ शालतिएलया काय् यरूबाबेल, योसादाकया काय् येशूअ, पुजाहारीत, लेवीत अले बेबिलोनं लिहांवःपि सकसिनं ज्या शुरु यात। परमप्रभुया देगः दय्काच्चंगु ज्या स्वयेत निइँ व व स्वयां च्वय्यापि लेवीतय्त इमिसं ल्यल।

9 लेवी येशूअ, वया कायपि व किजापि अले कादमीएल व वया कायपि (होदबिया सन्तान) अले हेनादाद वंशयापि लेवीत सकल मिलय् जुयाः परमेश्वरया देगः दय्केगु ज्या याइपिन्त स्वयेगु ज्या यात।

10 परमप्रभुया देगः दय्कीपिन्सं जग तयेधुंकाः पुजाहारीत थथःगु वसः फिनाः तुरही ज्वनाः अले आसापया वंशयापि लेवीत थथःगु भुस्याः ज्वनाः न्हापा इस्त्राएलयाम्ह जुजु दाऊदं आज्ञा ब्यू थें परमप्रभुयागु प्रशंसा यायेत दन।

11 इमिसं परमप्रभुयात प्रशंसा यानाः व सुभाय् बियाः थथे धकाः भजन हाल,
“वय्कः भिंम्ह खः,

इस्त्राएलया निर्ति वय्कःया दयामाया सदां दयाच्चनी
न्ह्याबलें दयाच्चनी।”

अले सकलें मनूतय्सं तसलं हालाः परमप्रभुयात तःधंकल, छायेधाःसा देगःया जग तये धुंकूगु खः।

12 न्हापायागु देगः खंपि बुरापि पुजाहारीत, लेवीत व परिवार परिवारया नायःत थ्व देगःया जग तःगु खनाः हँयहँय् ख्वल। मेपिन्सं धाःसा लय्लय्तायाः जयजय यात।

13 सुनानं लसतां हाःगु सः व ख्वःगु सः पाके मफुत छायेधाःसा मनूतयगु सः तसकं तःसः अले सः यक्व तापाक तक ताये दु।

† 3:6 ३:६ न्हयगूगु लाया न्हापांगु दिननिसें थथे धयागु ई.पु. ५३७ खः। ‡ 3:8 ३:८ निगूगु दँया निगूगु लाय् यरूशलेमय् परमेश्वरया देगलय् इपि थ्यंकः वःगु निगूगु दँया निगूगु लाय् एप्रिल-मे ई.पु.५३७ य खः।

4

देगः दय्केगु ज्याय् विरोध

1 ज्वनाय्कृपि लिहां वयाः परमप्रभु इस्राएलया परमेश्वरया देगः दय्काच्वंगु दु धयागु खँ यहदा व बेन्यामीन कुलया शत्रुतय्सं न्यन।

2 उकिं इमिसं यस्बाबेल व परिवार परिवारया नायःतथाय् वनाः धाल, “जिमित नं छिपिनापं देगः दय्केब्यु छाय्धाःसा जिपि नं छिमि परमेश्वरयात आराधना याइपि खः। जिमित थन हःम्ह अशशूरया जुजु एसरहदोनया पालनिसें हे जिमिसं वय्कःयात हे बां बियावयाचवनागु दु।”

3 यस्बाबेल, येशूअ व इस्राएलया परिवारया मेपि सकल नायःतय्सं धाःसा इमित थथे लिसः बिल, “परमप्रभु जिमि परमेश्वरया नितिं दय्का चवनागु थ्व देगःलिसे छिमिगु छुं नं स्वापु मदु, फारसयाम्ह जुजु कोरेसं जिमित आज्ञा ब्यू थें देगः जिमिसं हे दय्के।”

4 अनंलि व थासय् चवनाच्वंपि मनूतय्सं यहदीतय्गु नुगः क्वतुंकाबीत व देगः दय्केगु ज्या पनेत ख्वायेगु याना हल।

5 यहदीतय्गु योजना स्यंकाबीत इमिसं फारसया सरकारी हाकिमतय्त घुस नकल। फारसयाम्ह जुजु कोरेस जुजुया जिवंकाछि व फारसयाम्ह जुजु दाराया पालय् तक इमिसं अथे याना हे च्वन।

अहासूरस व अर्तासास्त जुजु जुयाच्वंबलय् विरोध

6 अहासूरस जुजुं शासन याःगु शुस्या इलय् यहदा व यस्शलेमय् च्वंपि मनूतय्गु विरोधय् इमि शत्रुतय्सं छगू द्रुपं पौ च्वयाः छवत।

7 हाकनं फारसयाम्ह जुजु अर्तासास्तया पालय् विश्लाम, मित्रेता, ताबेल व इपिनापं ज्या याइपिन्सं जुजुयात छगू पौ च्वल। पौ आरमेइक भाषाय् व आरमेइक आखलं च्वःगु खः।

8 राज्यपाल रेहम व प्रदेशयाम्ह छ्यानजे शिम्शै नं यस्शलेमया विरोधय् थज्याःगु पौ अर्तासास्तयात च्वल।

9 राज्यपाल रेहम व प्रदेशयाम्ह छ्यानजे शिम्शै, इपिनापं ज्या याइपि अर्थात त्रीपोलीस, फारस, एरेक व बेबिलोनयापि मनूतय्त अधिकार याइपि न्यायाधीशत व हाकिमत अले शूननयापि एलामीत व

10 तःधंम्ह व हनाबना बहःम्ह अशूरवनिपलं देशं पितछवयाः सामरिया शहरय् व पच्छिम यूफ्रेटिस प्रदेशया मेमेगु थासय् हयातःपिं,

11 इमिसं छवगु पतिइ थथे धका: च्वयात:गु दु —

महाराज अर्तासास्तयात छ:पिनि दास, यूफ्रेटिस पारियापि मनूतपाखें ज्वजलपा,

12 “छ:पिनिगु राज्ययागु थीथी थासं व:पिं यहूदीत यरूशलेमय् च्वनाच्चंगु अले व दुष्ट व विद्रोही शहरयात हाकनं दय्काच्चंगु खँ महाराजं सीकादिसँ। अले इमिसं उकियागु जग ल्हना: पखा: दय्काच्चंगु दु धयागु खँ सीकादिसँ।

13 महाराज, थ्व शहर हाकनं दय्कल धा:सा अले थुकिया पखा: दय्केगु ज्या सिधल धा:सा मनूतय्सं कर पुली मखु अले महाराजया धुकुतिइ धिबा कम जुइ।

14 “छ:पिन्सं जिमिगु लागि यक्व गुण यानादीगुलि सकसिनं छ:पिन्त हनाबना त:गु जिमित य:। अथे जुया: छ:पिनि न्ह्य:यापिं जुजुपिन्सं तयात:गु पुलांगु भ्वँतय् मालास्वयादिसँ धका: थ्व खबर छवया हयाच्चवनागु दु।

15 पुलांगु भ्वँतय् माला स्वल धा:सा थ्व यरूशलेम शहर छगू विद्रोही शहर जुगु व पुलांगु इलंनिसें हे जुजुपिं व प्रदेशयापि शासकतय्त दु:ख बियावयाच्चंगु खँ छ:पिन्सं सीकादी। अथे जुया: हे थ्व शहरयात नाश या:गु ख:।

16 यरूशलेम शहर हाकनं दय्कल धा:सा अले थुकिया पखा: दनेगु ज्या सिधल धा:सा यूफ्रेटिसया पच्छिमया प्रदेशय् छ:पिनिगु छुं अधिकार दइ मखु धका: महाराजं सीकादिसँ।”

पखा: दय्केगु ज्या दिकूगु

17 जुजु अर्तासास्तं थथे लिस: बिल,

राज्यपाल रेह्म, प्रदेशयाम्ह छ्यान्जे शिम्शै अले सामरिया व पच्छिम यूफ्रेटिसयागु प्रदेशया मेगु ल्यंदनिगु इलाकाय् च्वपिं इमिनापं ज्या याइपिन्त ज्वजलपा।

18 छिमिसं छवयाह:गु पौ भाय् हिला: जित: ब्वना न्यंकल।

19 जिं मालास्वयेत आज्ञा बिया, पुलांगु इलंनिसें हे यरूशलेमं जुजुया अधिकारया विरोधय् राजद्रोह या:गु व अन गोलमाल व राजद्रोह जुया वयाच्चंगु खँ सीदत।

20 बल्ला:पिं जुजुपिन्सं अन यूफ्रेटिस पच्छिमया प्रदेश न्यंक राज्य या:गु दु। अनयापिं मनूतय्के सरकारी कर का:गु दु।

21 उकिं जिं हानं मेगु आज्ञा मब्युतले थुपिं मनूतय्त शहर दय्केगु ज्या दिकेत आज्ञा ब्यु।

22 थ्व ज्या यायेत लिबाके मते। जुजुपिन्त स्यंकीगु ज्या मजुइमा:।

23 जुजु अर्तासास्तयागु थ्व पौ रेहम व छ्यान्जे शिम्शै व इपिनापं ज्या याइपि मनूतयगु न्ह्यःने ब्वनाः न्यंके धुंकाः इपि याकनं यरूशलेमया यह्दीतयथाय् वन अले इमित जबरजस्ती ज्या यायेत पन।

24 थुकथं यरूशलेमय् परमप्रभुयागु देगःया ज्या दित। फारसया जुजु दारां राज्य याःगु निगूगु दें* तक व ज्या दित। ☆

5

देगः दय्केगु ज्या हाकनं शुरू याःगु

1 उबलय् अगमवक्ता हागै व इद्रोया सन्तान जकरिया अगमवक्तां यरूशलेम व यह्दायापिं यह्दीतयत्, इमित अधिकार यानादीम्ह इस्त्राएलयाम्ह परमेश्वरया नामय् अगमवाणी यात।

2 इमिगु खँ न्यनाः शालतिएलया काय् यरूबाबेल व योसादाकया काय् येशूअं यरूशलेमय् परमेश्वरयागु देगः दय्केगु ज्या हाकनं शुरू यात। परमेश्वरया अगमवक्तातय्सं नं इपिनापं च्वनाः इमित ग्वाहालि यात।☆

3 उगु हे इलय् पच्छिम यूफ्रेटिसया प्रदेशयाम्ह राज्यपाल तत्तनै, शन्तर-बोज्जै व इपिनापं ज्या याइपिं इमिथाय् वयाः थथे धाल, “सुनां छिमित थ्व देगः दय्केगु व थुकियात माःगु सामान ज्वरय् यायेगु अधिकार बिल?”

4 इमिसं इमिके देगलय् ज्या यानाच्चंपि मनूतयगु नां नं न्यन।

5 अयनं यह्दी नायःतयत् परमेश्वरं बिचाः यानाच्चनादीगुलि दारायाथाय् थ्व बुखँ थ्यनाः उकियागु लिसलय् जुजुया पौ मवतले सुनानं इमित पने मफुत।

दारा जुजुयात तत्तनैया पौ

6 पच्छिम यूफ्रेटिसया प्रदेशयाम्ह राज्यपाल तत्तनै, शन्तर-बोज्जै व इपिनापं ज्या याइपिं यूफ्रेटिसया पच्छिमयापिं हाकिमतय्सं दारा जुजुयात छवःगु पौ थ्व हे खः।

7 इमिसं थथे च्वयातःगु पौ छवल –

महाराज दाराया ज्वजलपा!

8 महाराज, जिपिं यह्दा जिल्लाय् तःधंम्ह परमेश्वरया देगः दुगु थासय् वना। अन मनूतय्सं तःधंम्ह परमेश्वरया देगः ततःग्वःगु ल्वहँत दनाच्चंगु दु। अले पःखालय् ततःहाकःगु सिं तयाच्चंगु दु। ज्या बांलाक जुयाच्चंगु दु अले इमिसं याकनं याकनं ज्या यानाच्चंगु दु।

* 4:24 ४:२४ निगूगु दें थथे धयागु ई.पु. ५२० य् खः। ☆ 4:24 ४:२४ हाग १:१; जक १:१ ☆ 5:2 ५:२ हाग १:१४; जक ४:९

9 “सुनां छिमित देगः हाकनं दय्केगु व उकियागु सामान ज्वरय् यायेगु अधिकार बिल धकाः जिमिसं मनूतय् नायःतयत् न्यना।”

10 च्वयाः छिथाय् छ्वयाहयेत जिमिसं इमि नायःतयगु नां नं न्यना।

11 इमिसं जिमित थथे लिसः बिल, “जिपिं स्वर्ग व पृथ्वीयाम्ह परमेश्वरयात सेवा याइपिं खः। यक्व दँ न्ह्यः इस्त्राएल्लयाम्ह छम्ह तःधम्ह जुजुं दय्कूगु देगः हे जिमिसं हाकनं दय्का च्वनागु खः।

12 अयूनं जिमि पुरखातय्सं स्वर्गयाम्ह परमेश्वरयात तंचायकूगुलि वय्कलं जिमि पुरखातयत् बेबिलोनयाम्ह कल्दी जुजु नबूकदनेसरया ल्हातय् बिधादिल। नबूकदनेसरं थ्व देगःयात भज्यंक स्यंकाबिल अले मनूतयत् बेबिलोनय् ज्वना यंकल।

13 “अथेसां बेबिलोनयाम्ह जुजु कोरेसया न्हापांगु दँय्* जुजुं परमेश्वरया थ्व देगः हाकनं दय्केत आज्ञा बिल।

14 नबूकदनेसरं यरूशलेमया देगलं बेबिलोनया देगलय् हःगु परमेश्वरया देगःयागु लुं व वहःयागु थलबल नं थम्हं राज्यपाल ल्ययातःम्ह शेशबस्सर नांयाम्ह मनूयात लित बिल।☆

15 अले वं वयात धाल, ‘थ्व फुक्क थलबल यंकाः यरूशलेमया देगलय् हाकनं तयाब्यु अले परमेश्वरयागु देगः न्हापायागु हे थासय् हाकनं दय्कि।’

16 “उकिं शेशबस्सरं यरूशलेमय् वयाः परमेश्वरयागु देगःया जग तल। उबलय् निसें आः तक देगः दय्केगु ज्या जुयाच्चंगु दु तर आः तक सिधःगु मदुनि।”

17 अथे जुयाः महाराज! छिगु इच्छा दुसा जुजु कोरेसं थ्व यरूशलेमयागु देगः हाकनं दय्केत उजं ब्यगु खः कि मखु धकाः बेबिलोनय् दुगु जुजुया सफूधुकुतिइ मालादिसँ। अनंलि महाराजया इच्छा छु खः व जिमित च्वयाः हयादिसँ।

6

दारा जुजुयागु आज्ञा-पौ

1 अले जुजु दारायागु आज्ञा कथं बेबिलोनयागु धुकुतिइ तयातःगु पुलांगु भ्वंत पुइका स्वल।

2 मादी प्रान्तया एकबातना शहरय् थथे च्वयातःगु छगू भ्वँ लुल। उकी च्वयातःगु लुमन्ति पौ थथे दु –

* 5:13 ५:१३ न्हापांगु दँ थथे धयागु ई.पु. ५३८

☆ 5:14 ५:१४ एज़ १:२-११

3 “कोरेस जुजुयागु न्हापांगु दैय् यरूशलेमया देगःया बारे जुजुं छगू आज्ञा-पौ पिकाल।

“आज्ञा थ्व खः - बां बीत व होमबलि छायेत यरूशलेमया देगः व न्हापा दुथाय् हे हाकनं दय्केमाः, अले थुकियागु जग न्हापायागु थासय् हे तयेमाः। थ्व स्विगू मिटर तःजाःगु व स्विगू मिटर ब्या दुगु जुइमाः।

4 ततःग्वःगु ल्वहंया स्वेगू तँ घःने छगू तँ सिं तयेमाः। थुकी जूगु खर्च जुजुया धुकुति पुलेमाः।

5 नबूकदनेसरं यरूशलेमया देगलं बेबिलोनय् हःगु परमेश्वरया भवनया लुं व वहःयागु थलबल नं लितयंकाः यरूशलेमयागु देगलय् तयाबीमाः। व फुक्क लितयंकाः परमेश्वरया भवनय् थथःगु थासय् तयाबीमाः।”

6 उकिं आः पच्छिम यफ्रेटिसयाम्ह राज्यपाल तत्तनै, शन्तर-बोज्जै व प्रान्तय् दुपि छिपिनापं ज्या याइपिं मनूत व देगलं तापाक च्वै।

7 छिमिसं देगः दय्काच्चंगु ज्या पने मते। यहूदायाम्ह राज्यपाल व यहूदी नायःतय्सं परमेश्वरयागु देगः उकियागु थासय् हे हाकनं दय्केमाः।

8 व ज्याय् इमित ग्वाहालि ब्यु धकाः जिं छिमित आज्ञा बी। इमिगु खर्च पच्छिम यफ्रेटिस प्रदेशय् मुंगु करं थर्थे ब्यु ज्या मदीमाः।

9 “न्हियान्हिंथं यरूशलेमय् पुजाहारीतय्सं छु छु माल धकाः धाइ व फुक्कं ब्यु। इमित स्वर्गयाम्ह परमेश्वरयात होमबलि छायेत द्रुहंत, भ्याःचात व चिधिकःम्ह भ्याःचात अले छ्व, चि, दाखमघ व जैतूनया चिकं मद्रुक ब्यु।

10 इमिसं स्वर्गयाम्ह परमेश्वर लयताइगु बलित छायेमा अले जुजु व जुजुया काय्पिनिगु भिया नितिं प्रार्थना यायेमा धकाः छिमिसं अथे या।

11 “उलि जक मखु सुनां थ्व आज्ञा पालन याइ मखु वयागु छँयागु थां लिक्काः वयात उकिं हे सुया यख्खानाब्यु धकाः जिं आज्ञा बी। थ्व अपराधया नितिं वयागु छँयात थुनाः द्रुं दय्काब्यु।

12 यरूशलेमया देगःयात नाश यायेत वा थ्व आज्ञायात हीकेत सुं नं जुजुं वा जातिं ल्हाः ल्हन धाःसा थःगु नांयात अन थापं यानादीम्ह परमेश्वरं हे इमित नाश यानादीमाः।

“जि दारां थ्व आज्ञा पिकयागु दु। थुकियात बांलाक मानय् यायेमाः।”

देगः दय्केगु ज्या सिधःगु

13 अथे जुयाः यूफ्रेटिस पारियाम्ह राज्यपाल तन्तनै अले शन्तर-बोज्जै व इपिनापं ज्या याइपिन्सं दाराया आज्ञा बांलाक मानय् यात।

14 उकि यहदीतय् नायःतय्सं अगमवक्ता हागै व इद्देया सन्तान जकरियापाखे हपाः दयाः ज्या बांलाक न्ह्यज्याकल। इमिसं परमेश्वरया आज्ञा कथं अले फारसयापि जुजुपि कोरेस, दारा व अर्तासास्तपिनिगु आज्ञा कथं देगः दय्केगु ज्या सिधय्कल।

15 दारा जुजुं शासनयागु खुगू दैयागु अदार लाया स्वन्हु खुन्हु देगःया ज्या सिधल।

16 उबलय् इस्राएलयापि मनूत — पुजाहारीत, लेवीत व ज्वनायंकाः लित छवयाहःपि मेपि, सकसिनं लयल्यतातां नखः हनाः देगः देछात।

17 थ्व नखःबलय् इमिसं सछिम्ह (१००) द्वहं, निसःम्ह (२००) भ्याःचा, प्यसःम्ह (४००) चिधिकःपि भ्याःचा व होमबलि छाल। अले इस्राएलया झिनिगू कुलया नितिं झिनिम्ह दुगुचा शुद्ध जुइगु बलिकथं छाल।

18 अले इमिसं मोशाया सफुलिइ च्वया तः थें यरूशलेमय् देगलय् सेवा यायेत पुजाहारीत व लेवीतयगु थीथी पुचः दय्कल।

छुत्काराया नखः हंगु

19 न्हापांगु लाया झिप्यन्हु खुन्हु, ज्वनायंकाः लित छवयाहःपिन्सं छुत्काराया नखः हन।

20 पुजाहारीत व लेवीतय्सं छगू मन जुयाः थःपिन्त शुद्ध याःगु खः उकि इपि सकलें शुद्धपि खः। अले लेवीतय्सं ज्वनायंकाः लित छवयाहःपि सकल मनूतयगु नितिं व थः दाजुकिजा पुजाहारीतयगु नितिं अले थथःगु नितिं छुत्काराया चिधिकःम्ह भ्याःचा बलि बिल।

21 ज्वनायंका तयातःगु थासं लिहांवःपि सकलें इस्राएलीतय्सं जक मखु, परमप्रभु इस्राएलया परमेश्वरयात आराधना यायेत थःगु थितिकुति त्वःतूपि उगु देशय् च्वनाच्चपि मेगु जातियापि मनूतय्सं नं भवय् नल।

22 अले इमिसं सोडा मतःगु मरिया नखः न्हयन्हु तक न्ह्यइपुक हन। परमप्रभु अशशूरयाम्ह जुजुयागु मन हिलादीगुलि अले वं इस्राएलयाम्ह परमेश्वरयागु देगःया ज्याय् इमित ग्वाहालि ब्यगुलि इपि थथे लय्ताःगु खः।

7

एज़ा इस्राएलय् वःगु

1 यक्व दँ लिपा, फारसयाम्ह जुजु अर्तासास्तया पालय्* एज़ा नांयाम्ह छम्ह मनु दु। एज़ा सरयाहया काय् खः। सरयाह अजर्याहया काय् खः। अजर्याह हिल्कियाहया काय् खः।

2 हिल्कियाह शल्लूमया काय् खः। शल्लूम सादोकया काय् खः। सादोक अहीतूबया काय् खः।

3 अहीतूब अमर्याहया काय् खः। अमर्याह अजर्याहया काय् खः। अजर्याह मरायोतया काय् खः।

4 मरायोत जरयाहया काय् खः। जरयाह उज्जीया काय् खः। उज्जी बुक्कीया काय् खः।

5 बुक्की अबीशूया काय् खः। अबीशू पीनहासया काय् खः। पीनहास एलाजारया काय् खः। एलाजार दकलय् तःधंम्ह पुजाहारी हारूनया काय् खः।

6 एज़ा परमप्रभु इस्राएलयाम्ह परमेश्वरं मोशायत ब्यूगु व्यवस्था बांलाक स्यनेसःम्ह शास्त्री खः। वयात परमप्रभु परमेश्वरया सुवाः दुगुलि वं फ्वंगु फुक्क खँ जुजुं वयात बिल। थथे जूगुलि एज़ा बेबिलोनं यस्शलेमय् वल।

7 जुजु अर्तासास्तया न्हयगूगु दँय् छपुचः इस्राएलीत बेबिलोनं यस्शलेमय् वल।† उगु पुचलय् पुजाहारीत, लेवीत, देगलय् म्ये हालीपिं व देगलय् पिवाः च्वनिपिं व देगलय् सेवा याइपिं नं दुथ्याः।

8 व हे जुजुया न्हयगूगु दँया न्यागूगु लाय् एज़ा यस्शलेमय् थ्यंकः वल।‡

9 न्हापांगु लाया न्हापांगु न्हिखुन्हु व बेबिलोनं पिहां वःगु खः।§ अले परमेश्वरया ग्वाहालि न्यागूगु लाया न्हापांगु दिखुन्हु यस्शलेमय् थ्यंकः वल।*

10 छायाःसा एज़ां थःत परमप्रभुयागु व्यवस्था ब्वनेत व पालन यायेत अले थुकियागु विधि व नियम इस्राएलय् स्यनेत देछाःगु खः।

एज़ाया निंति अधिकार पौ

11 परमप्रभुं इस्राएलयात बियादीगु व्यवस्था व उजं बांलाक स्यूम्ह पुजाहारी व शास्त्री एज़ायात जुजु अर्तासास्तं थथे च्वयातःगु अधिकार पौ बिल –

* **7:1** ७:१ अर्तासास्त थ्व जुजुं ई.पु. ४६५-४२४ तक शासन याःगु खः † **7:7** ७:७ ई.पु. ४५८ अप्रिल ८ य जुजु अर्तासास्तया न्हयगूगु दँय् छपुचः इस्राएलीत बेबिलोनं यस्शलेमय् वल। ‡ **7:8** ७:८ ई.पु. ४५८ अप्रिल ८ य व हे जुजुया न्हयगूगु दँया न्यागूगु लाय् एज़ा यस्शलेमय् थ्यंकः वल। § **7:9** ७:९ ई.पु. ४५८ अप्रिल ८ य न्हापांगु लाया न्हापांगु न्हिखुन्हु व बेबिलोनं पिहां वःगु खः। * **7:9** ७:९ ई.पु. ४५८ अप्रिल ८ य अले परमेश्वरया ग्वाहालि न्यागूगु लाया न्हापांगु न्हिखुन्हु यस्शलेमय् थ्यंकः वल।

12 जुजुतय् नं जुजु अर्तासास्तपाखें, स्वर्गयाम्ह परमेश्वरयागु व्यवस्थाया शास्त्री पुजाहारी एज़ायात ज्वजलपा!

13 जिगु साम्राज्य दुने च्वंपिं सुं नं मनु, पुजाहारी व लेवी यस्शलेमय् वने न्ह्याःसा छनापं वने फु धकाः जिं आज्ञा बी।

14 एज़ा, जि व जिमि न्हय्मह सल्लाह बीपिन्सं छन्त यहदा व यस्शलेमय् छवयाच्वनागु दु। छं अन छिमित पालन यायेत ब्यूगु परमेश्वरयागु व्यवस्था बांलाक मानय् याःगु दु कि मदु? अले अनयागु हालत गय् गथे च्वं व स्व।

15 जिं व जिमि सल्लाह बीपिन्सं यस्शलेमय् च्वनादीमह इस्राएलया परमेश्वरयात थःगु इच्छां बियागु लुँ व वहः नं छं यंकि।

16 छिमिसं फुक्क बेबिलोन प्रान्तय् मुनेत्यंगु लुँ व वहः अले मनूतय्सं व पुजाहारीतय्सं यस्शलेमय् इमि परमेश्वरया देगःया निति थःगु इच्छां देछाःगु नं छं यंकि।

17 थ्व धिबां द्रुहंत, भ्याःचात, चिधिकःपिं भ्याःचात अले उपिनापं अन्नबलि व त्वँसा-बलिया सामान न्या, अले उमित यस्शलेमय् दुगु छिमि परमेश्वरया देगःया वेदीइ बलि छा।

18 ल्यं दुगु वहः व लुँ छ व छिमि यहदी दाजुकिजापिन्सं थःगु इच्छा कथं छ्यले फु अयनं व परमेश्वरया इच्छा कथं जुइमाः।

19 “छिमि परमेश्वरया देगल्य् सेवा यायेत छंगु जिम्माय् ब्यूगु फुक्क थलबल यस्शलेमया परमेश्वरयात लःल्हानाब्यु।

20 छिमि परमेश्वरया देगःया निति मेगु छुं माःसा जुजुया धुकुतिं यंकि।

21 “यूफ्रेटिसया पच्छिमयागु प्रान्तयापिं सकल दांभरितय्त जिं थ्व उजं बी – स्वर्गयाम्ह परमेश्वरयागु व्यवस्थाया शास्त्री पुजाहारी एज़ां फ्वंगु न्ह्यागु नं ज्वरय् यानाः ब्यु,

22 वहः ३,४०० किलोग्राम तक, छव १०,००० किलोग्राम तक, दाखमघ २,००० लिटर तक, जैतूनया चिकं २,००० लिटर तक अले माक्व चि वयात ब्यु।

23 स्वर्गयाम्ह परमेश्वरयात वयकःया देगःया निति माःगु फुक्क छिमिसं बांलाक ब्यु। मखुसा जि व जिमि कायपिन्के परमेश्वरया तं लाइ।

24 पुजाहारीत, लेवीत, म्ये हालीपिं, ध्वाखाय् पिवाः च्वनिपिं, देगल्य् सेवा याइपिं वा परमेश्वरया थ्व देगःयागु मेमेगु ज्या याइपिन्के सरकारी कर वा महसूल कायेगु छिपिं छ्यानजेतय्त अधिकार मदु धकाः छिमिसं सीकि।

25 “छ एज़ां धाःसा छंके दुगु छिमि परमेश्वरयागु बुद्धिकथं यूफ्रेटिसया पच्छिमयागु प्रान्तयापि छिमि परमेश्वरयागु व्यवस्था पालन यानाः न्याय याइपि मनूत व हाकिमत ल्य। व्यवस्था मस्यूपिन्त धाःसा छं स्यँ।

26 छिमि परमेश्वरयागु व्यवस्था व जुजुयागु कानून पालन मयाइपि न्ह्याम्ह हे जूसां वयात स्यानाछवयाः वा देशं पितिनाछवयाः वा धन-सम्पत्ति जफत यानाः वा कुनाः सजॉय बीमाः।”

एज़ां परमप्रभु परमेश्वरया प्रशंसा याःगु

27 परमप्रभु झी पुर्खातय् परमेश्वर धन्य खः। वय्कलं हे यस्शलेमय् दुगु परमप्रभुया देगःयात हनाबना तयेत जुजुयागु मनय् थ्व बिचाः तयादिल,

28 अले जुजु, वयात सल्लाहबीपि व जुजुया ततःधंपि भारदारतयत जितः सदां दइगु दयामाया याइपि दय्कादिल। उकिं परमप्रभु जिमि परमेश्वरयागु ल्हाः जिके दु धकाः सीकाः जिं साहस याना, अले जिनापं यस्शलेमय् थाहां वनेत इस्राएलयापि नायःत मुंका।

8

एज़ानापं लिहांवःपि नायःतय्गु नां धलः

1 अर्तासास्त जुजुं राज्य यानाच्चंबलय् बेबिलोनं जिलिसें वःपि परिवारया नायःत व इपि लिसे धलखय् दुथ्याःपि थुपि हे खः —

2 पीनहासया परिवारं — गेशोम।

ईतामारया परिवारं — दानिएल।

दाऊदया परिवारं — शकन्याहया काय् हतूश।

3 परोशया परिवारं — जकरिया अले वलिसें धलखय् नां दुथ्याःपि १५० म्ह मिजंत।

4 पहत-मोआबया परिवार — जरयाहया काय् एल्यहोएनै अले वलिसें २०० म्ह मिजंत।

5 जतूया परिवारं — यहासेलया काय् शकन्याह व वलिसें ३०० म्ह मिजंत।

6 आदीनया परिवारं — जोनाथनया काय् एबेद व वलिसें ५० म्ह मिजंत।

7 एलामया परिवारं — अतल्याहया काय् यशयाह व वलिसें ७० म्ह मिजंत।

8 शपत्याहया परिवारं — मिखाएलया काय् जबदियाह व वलिसें ८० म्ह मिजंत।

9 योआबया परिवारं — यहीएलया काय् ओबदिया व वलिसें २१८ म्ह मिजंत।

10 बानीया परिवारं — योसिपियाया काय् शलोमीत व वलिसें १६० म्ह मिजंत।

- 11 बेबैया परिवारं — बेबैया काय् जकरिया व वलिसें २८ म्ह मिजंत।
 12 अज्गादया परिवारं — हक्कातानया काय् योहानान व वलिसें ११० म्ह मिजंत।
 13 अदोनीकामया परिवारं — लिपा वःपि एलीपेलेत, यीएल, शमायाह व
 इपिलिसें ६० म्ह मिजंत।
 14 बिग्वैया परिवारं — उत्तै व जक्कूर, अले इपिलिसें ७० म्ह मिजंत।

एज़ां लिहां वनेत लेवीतयूत लुइकल

- 15 जिं थुपिं फुक्कसित अहावापाखे न्ह्याइगु खुसिया सिथय् मुंका, अले जिपिं
 स्वन्हु तक पाल ग्वयाः अन च्वना। जिं अन पुजाहारीत व फुक्क मनूतयूत ध्यान
 बियाः स्वयाबलय् छम्ह नं लेवी मखना।
 16 अथे जुयाः जिं नायःत एलीएजर, अरीएल, शमायाह, एल्नातान, यारीब,
 एल्नातान, नातान, जकरिया व मशुल्लाम अले निम्ह बुद्धि दुपिं मनूत योयारीब व
 एल्नातानयात सःतके छवया।
 17 जिं इमित कासिपिया धाःगु थाय्या लेवीतयू नायः इद्रोयाथाय् छवया। जिं
 इमित इद्रो व देगलय् सेवा याइपिं, वया थःलाःपिन्त इी परमेश्वरया देगलय् सेवाया
 ज्या यायेत मनूत छवया हजि धकाः धयाछवया।
 18 इी परमेश्वरयागु दया मायां इमिसं जिमिथाय् इस्राएलया काय् लेवीया सन्तान
 महली परिवारयाम्ह सःस्यूम्ह छम्ह लेवी शरेबियाह, वया काय्पिं व दाजुकिजापिं
 नाप फुक्कं यानाः झिंच्याम्ह मिजंतयूत छवयाहल।
 19 इमिसं मरारीया परिवारपाखें हशब्ब्याह व यशयाहनापं वया दाजुकिजा व
 काय्चापिं यानाः मुक्क निम्ह मिजंत नं छवयाहल।
 20 देगलय् सेवा याइपिं २२० म्ह नं वल। लेवीतयूत ग्वाहालि बीपिं थज्याःपिं मनूत
 तयेगु चलन जुजु दाऊद व वया हाकिमतयसं शुरू याःगु खः। थुपिं सकलें धलखय्
 नां दुथ्याःपिं खः।

यात्राया लागि प्रार्थना

- 21 जिपिं इी परमेश्वरया न्ह्यःने क्वमिलु जुइत व याउँक यात्राया निंति अले लैय्
 थः मस्त व थःगु सामानयागु रक्षाया निंति बिन्ति यायेत जिं अन अहावा खुसिया
 सिथय् अपसं च्वनेगु घोषणा याना।
 22 जिं जुजुयात, “जिमि परमेश्वरं वय्कःयाके भलसा तइपिं सकसितं सुवाः
 बियादी अले वय्कःयात त्वःतूपिं मनूतयूके वय्कःया तं दयाच्चनी” धकाः धाये

धुंकूगु जुया: आ: जिमित लँय् शत्रुतपाखें रक्षा यायेत जुजुयाके सलगइपि सिपाईत पवनेत जि मछाल।

23 थ्व हे खँयात कया: जिपि अपसं च्वना: थ: परमेश्वरयात बिन्ति याना, अले वय्कलं जिमिगु बिन्ति न्यनादिल।

24 अले जिं मू पुजाहारीतपाखें झिनिम्हय्सित अर्थात शरेबियाह, हशब्याह व इमि झिम्ह दाजुकिजापिन्ति ल्यया।

25 अले जुजु, वया सल्लाहबीपि व वया भारदारत अले बेबिलोनय् च्वनिपि सकल इस्राएलीतय्सं झी परमेश्वरया देगःया निंति ब्यूगु लुँ, वह: व थलबल लना: जिं इमित बिया।

26 थुकथं जिं इमित

२२,००० किलोग्राम वह:,

३,४०० किलोग्राम वह:या थलबल

अले ३,४०० किलोग्राम लुँ

27 लुँयागु निङग: ख्वल्चात- ९ किलोग्राम ति,

अले निग: बांला:गु कँययागु लुँ ति हे मू वंगु ख्वला लना: बिया।

28 जिं इमित धया, “छिपि परमप्रभु झी पुर्खाया परमेश्वरया निंति पवित्रपि ख:। अथे हे वय्क:यात थ:गु इच्छां देछा:गु लुँ व वह:यागु थलबल नं पवित्र ख:।

29 उकिं छिमिसं थुपिं ज्वलं यस्शलेमय् परमप्रभुया देगःया कोथाय् मू पुजाहारीत, लेवीत व इस्राएलीतय् नाय:तय् न्ह्य:ने लना: इमित मब्युतले छिमिसं थुपिं फुक्क ज्वलंया रक्षा या।”

30 थुकथं लनात:गु लुँ, वह: व थलबल पुजाहारीत व लेवीतय्सं यस्शलेमया झी परमेश्वरया देगलय् यकेत थ:गु जिम्माय् काल।

31 न्हापांगु लाया झिनिन्हु खुन्हु* यस्शलेमय् वनेत जिपि अहावा खुसिं न्ह्यावना। जिमि परमेश्वर जिपिलिसें दी अले वय्कलं यात्राय् शत्रुत व दाखुँतपाखें बचय् यानादिल।

32 यस्शलेमय् थ्यने धुंका: स्वन्हु तक जिमिसं आराम कया।

33 अले प्यन्हु खुन्हु वह: व लुँ अले उपि थलबल झी परमेश्वरया देगलय् लना: उरियाहया काय् मरेमोत पुजाहारीया जिम्माय् बिया। वलिसें पीनहासया काय् एलाजार व निम्ह लेवीत येशूअया काय् योजाबाद व बिन्नुईया काय् नोअदिया दु।

34 फुक्क मालसामान ल्या: खात, अले फुक्क तौल अबलय् हे च्वल।

* **8:31** ८:३१ ई.पु. ४५८ १९ अप्रिलय् न्हापांगु लाया झिनिन्हु खुन्हु यस्शलेमय् न्ह्यज्या:गु।

35 अनंलि ज्वनायंकाः लित छवयाहःपिन्सं इस्राएलया परमेश्वरया निति होमबलि छाल। फुक्क इस्राएलया निति झिनिम्ह (१२) द्रुहं, गुइखुम्ह (१६) भ्याःचा व न्हयेन्हयम्ह (७७) चिधिकःपि भ्याःचा अले पापबलिकथं झिनिम्ह दुगुचा छाल। थ्व फुक्क परमप्रभुया निति होमबलि खः।

36 अले इमिसं जुजुयागु आज्ञा-पौ जुजुया हाकिमत अले यूफ्रेटिसया पच्छिमयापि राज्यपालतयत् बिल। अनंलि इमिसं मनूतयत् व परमेश्वरया देगःया ज्याय् ग्वाहालि बिल।

9

मेगु जातियापि मनूतलिसें ब्याहा याःगु

1 थ्व फुक्क ज्या यायेधुंकाः नायःत जिथाय् वयाः धाल, “इस्राएलयापि मनूत, पुजाहारीत व लेवीतयसं नं थः जःलाखःला कनानी, हिती, परिज्जी, यबूसी, अम्मोनी, मोआबी, मिश्री व एमोरीतय्गु घच्चाइपुगु पुजायागु ज्यापाखें थःत अलग तःगु मदुनि।

2 इस्राएलयापि मिजंतयसं मेगु जातियापि मिस्तलिसें ब्याहा यानाच्चंगु दु। थुकथं परमेश्वरया पवित्र जाति स्यनावंगु दु। अले थ्व अपराधय् न्ह्यलुवा जुयाः यंकूगुलिइ मू नायःत व हाकिमत थुपि हे खः।”

3 थ्व खँ न्यनेवं जिं थःगु लं व गा खुना, छेनय् च्वंगु सँ व दाही पुया। अले तसकं वातां जुयाः फ्यतुना।

4 अले ज्वनायंकाः लित छवयाहःपिन्सं याःगु अपराधया कारणं इस्राएलया परमेश्वरयागु वचनपाखें ग्याःपि सकल मनूत जिथाय् मुंवल। सन्ध्याया बां बीगु इलय् तक जि अथे हे वातां जुयाः च्वनाच्चना।

5 सन्ध्याया बां बीगु इलय् जि दना। जिगु लं व गा गूगु दु। अले पुलि चुयाः परमप्रभु झी परमेश्वरपाखे थःगु ल्हाः ल्हनाः

6 थथे धकाः प्रार्थना याना —

एज़ाया प्रार्थना

“हे जिमि परमेश्वर, जिगु ख्वाः छिपाखे स्वकेत जितः तसकं मछालापुसे च्वं, छायाधाःसा हे जिमि परमेश्वर, जिमिगु पाप यक्व अप्वयावंगु दु अले जिमिगु दोष स्वर्ग तक थ्यंगु दु।

7 जिमि पुरखातयगु इलानिसें थौं तक हे जिमिसं तःधंगु पाप यानागु दु। जिमिगु पापं यानाः जिपि, जिमि जुजु व पुजाहारीत विदेशी जुजुपिनिगु ल्हातय लात। जिपि मध्ये गुलिसित स्यात, गुलिसित ज्वनाः विदेशय यंकल। जिमित लुटपाट यात, तसकं क्वह्यंकल, बेइज्जत यात। थौं तक नं अथे हे जुयाच्चंगु दु।

8 “तर थौं छुं ईया निति, परमप्रभु झी परमेश्वर, छिं जिमित दया यानाः छुं मनूतयत् बचय यानाः जिमित थःगु पवित्र थासय् छगू बल्लाःगु थाय् बियादीगु दु। थुकथं छि जिमि परमेश्वरं जिमिगु मिखाय् जः अले जिपिं दास जुयाच्चनागु इलय् भतिचा आराम बियादीगु दु।

9 जिपिं दासत जूसां झी परमेश्वरं जिमित व हे अवस्थाय् त्वःतामदी। छिगु कारणं फारसयाम्ह जुजुं जिमित ग्वाहालि याःगु दु। थ्व छिं जिमित न्हगु जीवन बियादीगु थें खः। छिं जिमित छिगु देगः दय्केबिल अले जिमित यहूदा व यस्सलेमय् आराम बियादिल।

10 “आः हे, जिमि परमेश्वर, थुलि जुइ धुंकाः जिमिसं छु धायेगु? छिं बियादीगु आज्ञा जिमिसं मानय् यानागु मदु।

11 छिं थः दास अगमवक्तातपाखें थथे धयादीगु दु, “छिमिसं अधिकार यायेत वनेत्यंगु देश अनयापि मनूतयगु अशुद्ध ज्या व घच्चाइपुगु ज्यां यानाः अशुद्ध जूगु दु। इमिसं देशयागु छगू कुन्चानिसें मेगु कुन्चा तक थःगु अशुद्ध ज्यां जायकाब्यूगु दु।

12 उकिं छिमिसं थः म्हाय्पिन्त इमि काय्पिलिसें व छिमि काय्पिन्त इमि म्हाय्पिलिसें ब्याहा यानाबी मते। छिमिसं गुबलय् नं इपिं लिसे स्वापु तये मते, छिमिसं थ्व उजं पालन यात धाःसा छिपिं बल्लाइ अले छिमिसं थ्व देशयागु भिंगु भिंगु नसा नइ। अले थ्व देश छिमि सन्तानयागु अधिकारय् न्हाबलें दयाच्चनी।’

13 “जिमिगु मभिंगु ज्या व तःधंगु दोषया कारणं जिमिसं दुःख स्यूगु जूसां छि, जिमि परमेश्वरं जिमित दयेमाःगु सजॉय स्वयाः कम सजॉय बियादिल। अले छिं जिमि छुं मनूतयत् छैं लितहयादिल।

14 छु जिमिसं हाकनं छिगु खँ मन्यंसे थज्याःगु घच्चाइपुगु ज्या याइपिलिसें ब्याहाया स्वापु तयेगु ला? छु छिं तंचायाः छम्ह हे ल्यंमदय्कः नाश यानामदी ला?

15 परमप्रभु इस्राएलयाम्ह परमेश्वर, छि धर्मीम्ह खः। छिं जिमित म्वाका तयादीगु दु। थन जिपिं थःगु दोषनापं छिगु न्ह्यःने दु, खःला थुकिं यानाः जिपिं मध्ये छम्ह नं छिगु न्ह्यःने दने मफये धुंकूगु खः।”

10

मनूतयस् पाप मानय् याःगु

1 एज़ा परमेश्वरया देगःया न्ह्यःने बैय् भ्वसुलाः ख्वख्वं पाप मानय् यानाः प्रार्थना यानाच्च्वंबलय् हे ग्वाः ग्वाः इस्राएली मिजं, मिसा व मस्त वयागु प्यखें मुन। इपिं नं ह्वाँय् ह्वाँय् ख्वल।

2 अनं लिपा एलामया परिवारयाम्ह यहीएलया काय् शकन्याहं एज़ायात धाल, “झीसं थ्व देशयापिं मेगु जातियापिं मिस्त ब्याहा यानाः थः परमेश्वरया आज्ञा पालन मयानागु दु, अयनं इस्राएलया निति अज्ज नं छुं आशा दनि।

3 अथे जुयाः आः झीसं झी प्रभुयागु व थः परमेश्वरयागु आज्ञा मानय् याइपिनिगु सल्लाहकथं थज्याःपिं सकलें मिस्त व इमि मस्ततय् त्वःतेत परमेश्वरया न्ह्यःने छगू बाचा चीनु। अले व्यवस्थाकथं ज्या यायेनु।

4 छि दनादिसँ, छायाधाःसा थ्व खँ छिगु हे ल्हातय् दु, जिपिं छिनापं दु, मग्यासे थ्व ज्या यानादिसँ।”

5 थथें हे एज़ां मू पुजाहारीत, लेवीत व सकल इस्राएलीतय् शकन्याहं धाःथें ज्या याये धकाः पाफय्कल। अले इमिसं पाफल।

6 अनं लिपा एज़ा परमेश्वरयागु देगःया न्ह्यःने एल्यासीबया काय् येहोहानानया कोथाय् वन। अन च्वंतले एज़ां छुं नं मनः, लः नं मत्वं, छायाधाःसा बेबिलोनं लिहां वःपिनिगु अपराधं यानाः वया नुगः ख्वः।

7 अनंलि बेबिलोनं लिहांवःपिं सकल मनूत यरूशलेमय् मुनेत यह्दा व यरूशलेम न्यंक खबर छ्वल।

8 स्वन्हुया दुने सुं वइ मखु हाकिमत व न्याय याइपिनिगु फैसला कथं वयागु फुक्क धन-सम्पत्ति जफत जुइ, अले वं थःमहं थःत बेबिलोनं लिहां वःपिनिगु सभां पितिनाछ्वइ धकाः नं नायःतय्सं आज्ञा बिल।

9 स्वन्हुया दुने, गुंगु लाया निइन्हुखुन्ह* यह्दा व बेन्यामीनया सकलें मनूत यरूशलेमय् मुन। सकलें मनूत थ्व तःधंगु घटनां यानाः दुखी जुयाः अले तसकं वा वयाः चिकुसे च्वंगुलि थुरथुर खानाः परमप्रभुया देगःया न्ह्यःने चुकय् च्वनाच्चन।

10 अले पुजाहारी एज़ां दनाः इमित धाल, “छिमिसं विदेशी मिस्तलिसें ब्याहा यानाः अपराध याःगु दु, अले थुकिं यानाः इस्राएलया दोष अप्वः जूगु दु।

* 10:9 १०:९ ई.पु. ४५८ डिसेम्बर १९ य् गुंगु लाया नीन्हुखुन्ह

11 उकिं आ: थ: पुर्खाया परमप्रभु झी परमेश्वरया न्ह्या:ने थथ:गु पाप मानय् या। वय्क:या इच्छा पूर्वकि अले विदेशी मनूतपाखें व छिमि विदेशी कला:पाखें छिपि ब्यागलं च्वँ।”

12 अले सभाय् मूपिं सकल मनूतय्सं त:सलं लिस: बिल, “छिं गथे धयादिल, जिमिसं अथे हे याये।

13 अयनं थन यक्व मनूत दु। अले वा वयाच्वंगु दु, उकिं जिपि पिने दनाच्वने फइ मखु। थ्व ज्या छन्हुनिन्हं सिधइ मखु, छाया:सा थ्व खँय् जिपिं मध्ये यक्वसिनं पाप यानागु दु।

14 झी हाकिमतय्सं सकल मनूतयगु लागि ज्या यानाबीमा:। परमेश्वरया तं क्वमला:तले व थ्व ज्या सिमध:तले झीगु शहरय् ग्व:म्हसिनं विदेशी मिसा ब्याहा या:गु दु, इपिं क्व:छिनात:गु इलय् थ:गु शहरयापि थकालित व न्याय याइपिलिसें वयेगु यायेमा:।”

15 असाहेलया काय् जोनाथन व तिक्भाया काय् याजयाहं जक मशुल्लाम व लेवी सब्बतैया पंलिना: थुकियागु विरोध यात।

16 अयनं ज्वनायंका: लित: छवयाह:पिन्सं अथे हे यात – पुजाहारी एज़ां परिवार परिवारयापि मू मू मनूत ल्यल। वं छगू छगू परिवार पुचलं छम्ह छम्ह मनू ल्यल। छम्ह छम्ह मनूयात नां काकां ल्य:गु ख:। अले झिगू लाया न्हापांगु दिननिसें† इमिसं थ्व खँया बारे गय् गथे ख: धका: स्वयेगु ज्या शुरू यात।

17 अले न्हापांगु लाया न्हापांगु दि तक‡ इमिसं विदेशी मिस्त ब्याहा या:पि मिजंतयगु बारे गय् गथे ख: धका: स्वयेगु ज्या सिधय्कल।

विदेशी मिस्तलिसें ब्याहा या:पिनिगु नां धल:-

18 विदेशी मिस्त ब्याहा या:पि पुजाहारी परिवारं –

योसादाकया काय् येशूअ व वया दाजुकिजापिनि परिवारं – मासेयाह, एजीएजर, यारीब व गदल्याह ख:।

19 इमिसं थ:थ: कला: त्व:तेगु बचं बिल, अले इमिसं दोषबलिकथं थथ:गु बथानं छम्ह छम्ह भ्या:चा नं हल।

20 इम्मेरया परिवारं – हनानी व जबदियाह।

21 हारीमया परिवारं – मासेयाह, एलिया, शमायाह, यहीएल व उज्जियाह।

† 10:16 १०:१६ ई.पु. ४५८ डिसेम्बर २९ य् झिगू लाया न्हापांगु दिननिसें ‡ 10:17 १०:१७ ई.पु. ४५७ मार्च २७ य् न्हापांगु लाया न्हापांगु दि तक

22 पशहरया परिवारं – एल्योएनै, मासेयाह, इश्माएल, नतनेल, योजाबाद व एलासा।

23 लेवीतपाखें – योजाबाद, शिमी, कलीता धाःम्ह केलायाह, पतहियाह, यहूदा व एलीएजर।

24 म्ये हालीपिंपाखें – एल्यासीब।

देगलय पिवाः च्वनिपिंपाखें – शल्लूम, तेलेम व ऊरी।

25 अले मेपि इस्त्राएलीतपाखें –

परोशया परिवारं – रम्याह, यिज्याह, मल्कियाह, मियामीन, एलाजार, मल्कियाह व बनायाह।

26 एलामया परिवारं – मत्तन्याह, जकरिया, यहीएल, अब्दी, यरेमोत व एलिया।

27 जतूया परिवारं – एल्योएनै, एल्यासीब, मत्तन्याह, यरेमोत, जाबाद व अजीजा।

28 बेबैया परिवारं- येहोहानान, हनन्याह, जब्बै व अत्लै।

29 बानीया परिवारं – मशुल्लाम, मल्लूक, अदायाह, याशूब, शाल व यरेमोत।

30 पहत-मोआबया परिवारं – अदना, केलाल, बनायाह, मासेयाह, मत्तन्याह, बजलेल, बिन्नूई व मनश्शे।

31 हारीमया परिवारं- एलीएजर, यिशियाह, मल्कियाह, शमायाह, शिमेओन,

32 बेन्यामीन, मल्लूक व शमरयाह।

33 हाशूमया परिवारं – मत्तनै, मत्तता, जाबाद, एलीपेलेत, येरैमै, मनश्शे व शिमी।

34 बानीया परिवारं – मादै, अम्राम, ऊएल,

35 बनायाह, बेदयाह, कलूही

36 भन्याह, मरेमोत, एल्यासीब

37 मत्तन्याह, मत्तनै व यासू।

38 बिन्नूईया परिवारं – शिमी,

39 शेलेम्याह, नातान, अदायाह,

40 मक्नादबै, शाशै, शारै,

41 अज्जेल, शेलेम्याह, शमरयाह

42 शल्लूम, अमर्याह व योसेफ।

43 नेबोया परिवारं – यीएल, मत्तित्याह, जाबाद, जबीना, यैदै, योएल व बनायाह।

44 थुपि सकसिनं विदेशी मिस्तलिसें ब्याहा याःगु खः। थुपि मध्ये छुं मनूतय् थुपि बिदेशी मिस्तपाखें मचाखाचा नं दुगु खः।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7